

Familiarization, Internalization, Articulation (FIA) Key Terms © 2025 Word Collective Released under CC BY-SA 4.0 license. Familiarization, Internalization, Articulation (FIA) Key Terms has been adapted in the following languages Tok Pisin, عربي, Français, हिंदी, Bahasa Indonesia, Português, Русский, Español, Kiswahili, 简体中文 from Familiarization, Internalization, Articulation (FIA) © 2025 Word Collective. Released under CC BY-SA 4.0 license by Mission Mutual

S

sabbath

Sabat em i namba seven de insait long wik long **ol Ju**. Em i wanpela de bilong malolo o rest na **wosipim** God. Long dispela de, ol Ju i save bung wantaim long **sinagog**-wanpela lokel ples bilong ol Ju long bung-long **pre** na long putim yau long ol tising bilong God.

Ol Ju i save kaunim ol de stat long avinun i go long avinun. Dispela em i min olsem Sabat em i save stat long avinun bilong namba siks de, na pinis long avinun bilong namba seven de.

Long taim bilong Moses, God i tokim **ol Israel** long malolo long olgeta wok bilong ol long olgeta de namba seven. God i bin tokim ol manmeri olsem em i bin kamapim graun long sikspela de na em i malolo long de namba seven. Long dispela as, namba seven de em i wanpela **holi** de. Dispela de em i de bilong God. Taim ol manmeri malolo long olgeta namba seven de, ol i lainim olsem ol i ken trastim God long olgeta samting we ol i nidim. Ol i no nid long wok wok olgeta taim, bikos God i lukautim ol. Dispela de bilong malolo em i wanpela naispela presen bilong God i go long ol manmeri. Ol Israel i nid long kipim dispela de bilong malolo olgeta taim insait long wanpela yia, maski long bisi taim bilong havest. Taim ol i kipim dispela de bilong malolo, ol manmeri long ol narapela kantri i ken lukim olsem ol Ju em ol i narakain. Em i wanpela sain olsem ol Ju em ol i spesel lain bilong God.

Em i impoten tru long God olsem ol Israel i mekim ol rait samting long Sabat. Sapos wanpela man o meri i **mekim** wok long Sabat, yumi bai tok olsem dispela man o meri em i no “kipim Sabat,” o em i “brukim Sabat.” Em i samting nogut tru sapos wanpela man o meri i no kipim Sabat.

Sabat em i wanpela de bilong malolo long olgeta lain insait long wanpela famili, na bilong **wokmanmeri** bilong ol tu o **ol sleiv**, na long ol animal tu. Em i wanpela de bilong malolo long olgeta kriesen o olgeta samting we God i wokim.

Long taim bilong Jisas, ol tisa bilong lotu bilong ol Ju em ol i lukaut tru long no ken sakim tok bilong God, olsem na ol i mekim planti ol ekstra rul long Sabat. Ol dispela ol rul em ol i hat tru long bihainim. Ol lida bilong lotu i bin lus tingting olsem dispela de em i de bilong malolo na onaim God. Jisas na ol lida bilong lotu i bin gat sampela tok pait long Sabat. Jisas planti taim i save bel kros long ol lida bilong lotu bikos ol i ting olsem ol rul we ol manmeri i bin mekim i impoten

moa long gutpela **lo** we God i bin givim, na ol i no tingting long wanem samting tru em God i laikim.

sacrifice

Wanpela **sekrifais** em i wanpela gift o presen i go long God. Planti taim ol manmeri i save putim dispela gift o presen long wanpela bet we ol i wokim long graun o long ol bikipela ston, na ol i save kolim olsem wanpela **alta**. As tingting bilong wanpela sekrifais em ol manmeri i laik tok tenkyu long God long sampela samting, **wosipim** God, konfemim **rilesensip** bilong ol wantaim God, o askim long **fogivnes** long samting we ol i bin mekim rong. Wanpela sekrifais em i ken pasin bilong kilim wanpela animal, na bihain ol bai kukim long alta. Dispela gift o presen em i ken ol kaikai, oil, o ol spais we i gat gutpela smel.

Long stat bilong Olpela Testamen, i gat sampela stori bilong ol man i givim sekrifais i go long God: Kein na Abel, Noah, na **Abraham**. Bihain, taim God i givim **ol Israel** ol **lo** bilong em long han bilong Moses, God i bin givim ol manmeri ol instraksen long hau long givim ol sekrifais long em. Ol manmeri i no inap long bringim ol sekrifais long God long wanem kain taim ol i laik: Ol i nid long bringim ol sekrifais i go long **tabenakel**, na bihain long **tempel**. Tabenakel em i wanpela ples we ol Israel i save wosipim God. Em i wanpela tent we ol Israel i ken karim wantaim ol taim ol i travel i go long ol **wildanes o ples nating we i no gat man**. Bihain, taim ol Israel i bin sindaun insait long kantri bilong ol yet, ol i senisim tabenakel wantaim wanpela bilding we ol i kolim tempel.

Insait long tabenakel, na bihain em insait long tempel tu, **ol pris** em ol spesel lain we God i makim long mekim sekrifais bilong ol manmeri. Ol pris i save mekim **ol sekrifais** olgeta de, na i gat ol spesel sekrifais bilong ol festival na ol kastom wok. Ol manmeri i ken bringim tu wanpela sekrifais long laik bilong ol. Ol sekrifais i impoten tru long pasin bilong wosipim God. Bikos God em i **holi**, na ol manmeri i **pulap long sin** tru, ol manmeri i no inap long kam nating long ai bilong God. Ol manmeri i nid long kamap “klin” long ol sin bilong ol. Wanpela man o meri husat i kamap pyua-em i bin mekim kastom wok bilong kamap **klin**-na em i ken kam long ai bilong God. Ol sekrifais i helpim long mekim ol manmeri i kamap klin bai ol i ken kam long ai bilong God. Tasol, God i mekim klia tu long ol manmeri olsem em i no inap ekseptim ol sekrifais sapos ol manmeri i no pilim sori long ol nogut samting we ol i bin mekim na tru tru i laik long senis.

Klostu 40 yia bihain long Jisas i go bek long **heven**, ol manmeri bilong Rom i bin bagarapim olgeta **tempel** long **Jerusalem**. Long dispela taim na i go, **ol Ju** i

no inap moa long bringim ol sekrifais i go long God. Nupela Testamen i tisim yumi olsem Jisas em yet em i nambawan gupela sekrifais. Jisas i bin dai na God bai fogivim ol manmeri. Ol manmeri i no nid moa long bringim ol sekrifais i go long God, bikos Jisas i mekim yumi i kamap klin pinis: Jisas i bin mekim isi long yumi long kam long ai bilong God.

sadducee

Long taim bilong Jisas, i gat 2-pela impoten grup bilong ol **tisa** bilong lotu insait long [Israel](#). Dispela em **ol Farisi** na **ol Sedusi**. Ol Farisi em ol i save wari tru long bihainim gut tru olgeta lo bilong God, na ol i kamapim ol narapela **lo** bilong ol yet. Ol i laik long kipim ol yet i stap seperet long ol manmeri husat i no save bihainim ol lo bilong God. Ol Sedusi i save bihainim ol lo we ol i raitim insait long ol namba wan faivpela buk bilong Olpela Testamen. Ol i **bilip** olsem ol namba wan faivpela buk insait long Olpela Testamen em ol tasol i impoten. Ol i no bilip long laip bihain long dai, na ol i no bilip olsem i gat **ol enjel** o [Satan](#) i stap.

Ol i no olsem ol Farisi, ol Sedusi long taim bilong Jisas i save wok wantaim gavman bilong Rom, olsem na ol i gat moa pawa na influens long sait bilong politikis.

Sampela bilong **ol pris** insait long [Jerusalem](#) em ol i bin memba bilong Sedusi grup. Sampela bilong ol Sedusi em ol i pat tu bilong [Sanhedrin](#), dispela kot bilong lotu bilong **ol Ju**.

saint

Dispela wod **ol seint o ol santu** em i min olsem ol “**holi** manmeri.” Insait long Olpela Testamen, ol holi manmeri, o ol seint o santu, em ol manmeri husat i save bihainim [God](#) na ol lo bilong em-ol i manmeri bilong God, na ol i givim ol yet long em. Insait long Nupela Testamen, olgeta folowa bilong Jisas em ol holi manmeri, o ol santu o seint. Ol holi manmeri i save givim ol yet i go long God na God i save mekim ol i stap seperet long mekim wok bilong em na bihainim em.

salvation

Sapos yu **seivim** wanpela man o meri, yu reskiuim dispela man o meri long wanpela hatpela o denjeres situesen.

Taim **ol Israel** i stap long taim nogut, eksampel, taim ol enemi o birua i atekim ol, ol i save singaut long God long seivim ol. Ol i laikim God long helpim ol na protektim ol. Sapos God i no seivim ol manmeri, ol bai dai.

Insait long Nupela Testamen, yumi lainim olsem olgeta manmeri i stap long hevi na i nidim God long seivim ol. Na God i seivim yumi. God i seivim yumi bikos em i laikim yumi tru. God i seivim yumi taim em i salim pikinini man bilong em Jisas i kam long graun. Husat man o meri i trastim Jisas em bai i stap seif. Olsem na Baibel i tok olsem Jisas em i [Sevia](#) bilong yumi. Yumi no inap long helpim yumi yet. Yumi olgeta i nidim God long seivim yumi. Narapela we long tok dispela em olsem yumi olgeta i nidim salvesen o nidim God long kisim bek yumi. God em i wanpela tasol husat i ken givim salvesen long ol manmeri. God i save seivim ol manmeri na bai yumi no inap moa long pret. Yumi no inap moa long pilim sem. Nau yumi ken gat wanpela gupela **rilesensip** wantaim God, na yumi ken trastim em olsem bihain long yumi dai, yumi bai stap **oltaim** wantaim God.

Taim yu wok long trensletim “seivim” o “salvesen,” yu mas keaful long ol dispela samting:

Long ol sampela tok ples, yu olgeta taim i nid long tok wanem samting ol manmeri i nidim God long seivim ol **long en**. Eksampel, yu bai nid long tok olsem God i save seivim wanpela man o meri long dai o long panismen. O, yu bai nid long tok olsem wanpela man o meri i askim God long seivim em long samting we i ken kilim em, o seivim em long dai. Yu bai nid long tok ol narapela narapela samting we God i bai seivim ol long en, insait long ol narapela narapela hap bilong Baibel.

samaria

Insait long Olpela Testamen **Samaria** em i wanpela siti long not bilong [Israel](#). Insait long Nupela Testamen, Samaria em i nem bilong wanpela provins insait long Israel. Samaria em i stap namel long ol provins bilong [Judea](#) na [Galili](#).

Insait long Nupela Testamen, ol manmeri husat i stap long Samaria em ol i save kolim ol olsem ol Samariten. Ol Samariten em ol i no **ol Ju**, tasol ol i kain olsem ol hapkas-Ju. Dispela rilesensip namel long ol Ju na ol Samaria em i no gupela. Long andastem dispela, yumi nid long lukluk long sampela histori.

Long sampela taim insait long Olpela Testamen, bihain bilong King Solomon (dispela pikinini man bilong king [Devit](#)), nesen bilong Israel i bruk i go long tupela pat. Kingdom bilong not, we i gat 10-pela bilong 12-pela traib, em ol i bin kolim Israel. Kingdom bilong saut, we i gat tupela narapela traib, em ol i kolim Juda.

Klostu 700 yia bipo long Jisas i bon, king bilong Asaria i bin atekim kingdom bilong not na i rausim ol manmeri long hap i go long ol narapela ples. Dispela taim em ol i save kolim taim ol Isreal i stap long Asaria. Em i

wanpela plen o pasin bilong ol king long senisim ol manmeri long wanpela rijen we ol i winim na putim ol manmeri bilong narapela rijen i go long hap. Long dispela we, em i daunim sans bilong ol lokel manmeri long kamap strong gen na stat long agensim dispela king. Olsem na, king bilong Asaria i kisim planti lain Israel i go longwe na mekim ol i stap long ol narapela kantri. Na long ples bilong ol, king i putim ol manmeri husat i kam long ol narapela kantri. Ol dispela manmeri husat i kam long ol narapela kantri i marit wantaim ol manmeri husat i stap bek insait long Israel, na dispela miks grup i kamapim ol Samariten.

Long dispela rot, yumi no harim moa long ol lain Israel husat ol i bin rausim ol i go long ol narapela kantri. Dispela stori em i pinis wantaim stori bilong ol Isreal i go stap long Asaria.

Tasol, kingdom bilong saut long Israel, Juda, em i stap longpela taim moa. Klostu 600 yia bipo long Jisas i bon, king Nebukadnesa bilong Babilon i atekim na bagarapim Juda. Ol manmeri bilong Juda em nau ol i kolim ol olsem ol Ju, we i min olsem ol manmeri bilong Juda. King bilong Babilon i kisim planti Ju i go long kantri bilong em yet, wankain olsem king bilong Asaria i bin mekim. Tasol bihain long 70-pela yia, ol i larim ol Ju long go bek long Israel.

Olsem na planti Ju i go bek na sindaun gen insait long Juda, na bildim gen ol siti. Taim ol i stat long bildim gen **tempel** insait long **Jerusalem**, ol Samariten i kam long not na i laik long helpim ol. Tasol ol Ju i no trastim ol Samariten na i tok nogat long helpim bilong ol. Ol Samariten i bel nogut tru long dispela, na ol i bildim tempel bilong ol yet. Klostu wan handret yia bipo long Jisas i bon, wanpela rula bilong Ju i bagarapim tempel bilong ol Samariten. Olsem na ol Samariten i gat sampela risen wai ol i no laikim ol Ju!

Ol Samariten i lukim ol yet olsem ol lain tumbuna bilong Jakob, wankain olsem ol Ju. Ol i bilip long God na bihainim ol **lo bilong Moses**, tasol ol i no ekseptim ol narapela buk insait long Olpela Testamen. Ol i save prektisim **sekemsisen o pasin bilong katim skin**, wankain olsem ol Ju i mekim.

Ol Ju i no lukim ol Samariten olsem ol raitpela Ju. Ol Ju i no save toktok wantaim ol Samariten, na ol Ju i no larim wanpela Samariten i kamap wanpela Ju. Ol Ju i save heitim ol Samariten ating moa long ol i heitim ol manmeri husat i no ol Ju!

Long taim bilong Nupela Testamen, gavman bilong Rom i rulim ol Samariten na Ju wantaim. Wankain olsem ol Ju, ol Samariten i tingting na wetim God long salim wanpela **Sevia**. Ol i no bilip olsem dispela Sevia em bai wanpela tumbuna pikinini bilong king Devit,

tasol ol i bilip olsem Moses i promis olsem Sevia bai i kam-wankain tasol olsem ol Ju i bilip.

sanctification

Sapos wanpela man i **sengtifaim** o **konsekretim** wanpela man o meri, orait ol i dediketim em o mekim em i stap em yet long mekim wok bilong God: dispela man o meri em i kamap **holi**. Dispela man o meri em i no man nating o meri nating o odineri. Ol lain i ken sengtifaim o konsekretim wanpela objek o samting. Dispela em i min olsem ol i mekim wanpela objek o samting i kamap holi, o ol i mekim em i kamap samting we ol lain i ken yusim long mekim ol wok bilong God.

Oposit bilong sengtifaim wanpela man o meri em long **bagarapim** em, o mekim em i kamap olsem samting nating o man o meri nating o odineri na i no holi.

Insait long Nupela Testamen, ol manmeri husat i bilip long God long nem bilong Jisas em ol i givim ol yet i go long God. Ol i kamap ol holi manmeri bilong God, o ol manmeri we God i putim ol i stap ol yet long mekim ol wok bilong em. Ol dispela manmeri i save mekim ol pasin we God i laikim, na dispela em i min olsem ol i bihainim God insait long olgeta samting ol i mekim. Tasol ol manmeri olgeta taim i save gro na lainim long stap moa na moa olsem God i laikim ol long stap. Ol lain i raitim Nupela Testamen i save kolim pasin bilong lainim long stap long we God i laikim, olsem sengtifikesen.

sanctuary

Dispela wod sengsueri em min olsem wanpela **holi** ples-wanpela ples we i bilong **wosipim** God. Dispela wod sengsueri em sampela taim ol i save yusim olsem narapela wod bilong diskraibim **tempel** bilong God. Taim ol i yusim long dispela rot, orait em i minim nambawan impoten pat bilong tempel. Dispela wod tempel em ol i ken yusim long minim bilding na tu long minim ol ples autsait long dispela bilding, tasol dispela wod sengsueri em ol i save yusim tasol long minim bilding. Dispela wod sengsueri em i ken toktok tu long **tabenakel**, dispela tent we i isi long muvim we **ol Israel** i save yusim olsem wanpela ples bilong wosipim God bipo long ol i bildim tempel.

Bikos **Holi Spirit** i save stap insait long **ol biliva** bilong Jisas, Pol i tokim ol biliva olsem bodi bilong ol em i wanpela sengsueri bilong God. Olsem na bodi bilong yumi em i bilong wosipim God

sanhedrin

Sanhedrin em i nem bilong wanpela grup bilong ol lida bilong **ol Ju**. Ol dispela lain em ol manmeri i

makim ol long mekim disisen long sait bilong lotu na long ol narapela samting tu. Insait long taim bilong Nupela Testamen, [Israel](#) em ol Rom i bin bosim, tasol ol Ju o Judaman i ken mekim sampela disisen bilong ol yet. Ol dispela disisen i save kamap insait Sanhedrin. Ol Sanhedrin i save putim yau long ol kot keis na bihainim ol lo bilong lotu long mekim jasmen. Taim ol i bung long wanpela kot, ol i save sindaun raun long wanpela hap-sekol na ol i ken lukim wanpela narapela. Dispela man we i sanap long kot em i save sindaun long namel bilong sekol.

Narapela nem bilong Sanhedrin em i **kot bilong ol Ju, Kaunsil bilong ol Ju o Judaman**.

Yumi no save planti samting long Sanhedrin. I luk olsem ol lida bilong lotu kain olsem **ol pris, ol Sedusi**, na **ol Farisi** em ol i pat bilong dispela grup. Sampela lain husat i gat planti mani na kago na i no lida bilong lotu, ating ol tu i bin pat bilong Sanhedrin Dispela nambawan impoten pris, [hai pris o het pris](#), ating em i lida bilong Sanhedrin.

Sapos yu wanpela memba bilong Sanhedrin, yu wanpela impoten man tru.

Ol manmeri husat i mekim ap Sanhedrin em planti taim ol i agensim Jisas. Ol i givim em i go long gavman bilong Rom, na ol i laik olsem em i mas dai. Bihain long Jisas i dai na [kirap bek](#), ol Sanhedrin i arestim sampela bilong **disaipel** bilong Jisas.

satan

Dispela nem **Satan** em i min olsem birua, enem, o akyusa. Em i nem bilong Devel, [lidabilong](#) olgeta **ivel spirit o spirit nogut**.

God i bin wokim olgeta samting we i stap nau, olsem na God em i bin wokim ol spirit tu. God i bin wokim ol gutpela, olsem **ol enjel**, long mekim wok bilong em. Tasol sampela ol enjel i no laik stap aninit long God na sakim tok bilong em, na bihain ol i kamap ol ivel spirit o spirit nogut. Namba wan bilong ol ivel spirit we i gat moa pawa em ol i save kolim em devel, o Satan.

Satan em olgeta taim em i save traim long bagarapim wok bilong God. Satan i save traim o temptim ol manmeri long sakim tok bilong God. Em i save traim long mekim ol manmeri i tanim baksait long God taim em i giamanim ol. Satan em i gat moa pawa na em i denjeres, olgeta taim em i save painim ol we em i ken wok agensim God na agensim ol manmeri bilong God.

Bikos Satan em i pawaful yet long dispela taim, sampela taim Baibel i save kolim em “rula bilong dispela graun.” Sampela taim Satan em ol i kolim em **Belsabab**, we i min olsem “masta bilong ol ples

antap.” Sampela taim ol i save kolim em **Disiva o man bilong giaman**. Sampela taim ol i save komperim em i go long wanpela dragon o wanpela snek.

Tasol, God em i strong moa long Satan. Taim Jisas i bin dai na i **kirap bek**, God i bin brukim pawa bilong Satan. Maski God i larim Satan long yusim pawa bilong em yet long nau, taim Jisas i kam bek, Jisas bai winim Satan olgeta. God bai panisim Satan na olgeta ivel spirit, na ol bai no inap long wok agensim God na ol manmeri bilong em gen.

savior

Wanpela **Sevia** em i wanpela man o meri husat i save reskiuim ol manmeri long hevi we ol i stap long en o long ol samting we i ken bagarapim ol. Olgeta manmeri i stap insait long hevi na i nidim God long seivim ol. God i seivim yumi taim em i salim pikinini man bilong em Jisas i kam long graun. Husat man o meri i trastim Jisas em Jisas bai seivim em. Olsem na Baibel i tok olsem Jisas em i Sevia bilong yumi.

scribe

[Ol tisa bilong lo](#) em i wanpela grup bilong ol lida bilong lotu we i saveman bilong [lo](#) bilong God.

Dispela lo em i minim ol set instraksen we God i bin givim long ol manmeri bilong [Israel](#) insait long fest faivpela buk bilong Olpela Testamen, tasol ol tisa bilong lo i tisim tu olgeta [Skripsa](#), na i no ol pat bilong ol Buk bilong Baibel we i toktok long lo tasol. Ol Skripsa i toktok long pat bilong Baibel we yumi nau kolim Olpela Testamen.

Ol tisa bilong lo i save ekspleinim ol Skripsa i go long ol manmeri. Ol i no bin raitim daun ol eksplenesen tasol ol i tokim ol i go long ol sumatin bilong ol. Ol sumatin bilong ol i memoraisim ol eksplenesen, na tisim ol dispela eksplenesen i go long neks jeneresen. Ol manmeri i kontinu long edim moa na moa eksplenesen na diskasen long ol dispela eksplenesen. Long taim bilong Nupela Testamen, ol dispela eksplenesen we ol i putim insait long tingting o memoraisim, ol i kamap impoten tru long ol manmeri, ating moa impoten long ol Skripsa gen.

Long taim bilong Nupela Testamen, ol tisa bilong lo em ol impoten lain tru insait long komyuniti. Ol manmeri i soim ol bikpela rispek tru na planti taim kolim ol “[Rabai](#),” wanpela taitel we ol i save yusim long ol impoten tisa bilong lotu. I gat ol tisa bilong lo tu i stap insait long [Sanhedrin](#), dispela kot bilong lotu bilong **ol Ju**.

Ol tisa bilong lo em sampela taim ol i save kolim ol olsem ol **skraib**. Wanpela skraib em i minim wanpela

man o meri husat i ken rait. Planti manmeri long taim bilong Baibel em ol i no inap long rit ol rait. Sapos ol manmeri i nid long raitim samting, kain olsem wanpela leta, ol bai nid long haiarim wanpela skraib long raitim long ol. Ol skraib tu i save kopim ol Skripsa na bai ol raiting bilong Skripsa i no inap lus. Ol Skripsa em ol i no bin raitim i go daun long pepa, kain olsem nau yumi save mekim. Ol buk na pepa i no bin stap yet long dispela taim. Tasol, ol manmeri i bin save raitim ol Skripsa long ol longpela hap papirus o pasmen. Papirus em i wanpela hap pepa we i no strong we ol i mekim long ol wanpela plent, na pasmen em ol i mekim long skin bilong wanpela animal. Bikos ol dispela pepa i longpela tru, ol manmeri i save rolim ol. Nem bilong dispela kain rol pepa em skrol. Ol skrol em ol i ken bagarap hariap, planti taim ol dispela papirus skrol em ol i save bagarap hariap. Olsem na ol skraib olgeta taim i save mekim wok bilong kopim ol raiting long wanpela skrol i go long nupela skrol, bai dispela raiting i no inap long lus.

Tasol, taim Baibel i toktok long ol tisa bilong lo, fokus em i stap long save bilong ol lo bilong lotu, na i no long ol save bilong rait.

Taim yu wok long trensletim “ol tisa bilong lo,” yu mas lukaut long ol dispela samting:

Yu mas no ken yusim wanpela hap tok we i mekim ol lain i ting olsem ol dispela manmeri i tisim lo bilong wanpela kantri. Ating yu ken yusim wanpela hap tok olsem “ol tisa bilong lo bilong lotu,” o “ol saveman bilong lo bilong lotu,” o “ol saveman bilong Skripsa.”

scriptures

Wanpela **skripsa** em i ken minim wanem samting ol lain i bin raitim i go daun, tasol **planti taim** em i minim samting we ol lain i raitim i go daun na em i impoten tru long ol manmeri. Taim ol manmeri long Nupela Testamen i toktok long Skripsa, o **ol Skripsa**, ol i wok long toktok long ol pat bilong Baibel we **ol Kristen** nau i save kolim Olpela Testamen. Olpela Testamen em i gat “Lo na ol Profet” bikos ol raiting i stap insait long en em ol lo na instraksen we God i bin givim long ol manmeri bilong em long han bilong Moses, na ol narapela raiting i stap insait long en em ol raiting bilong **ol profet bilong ol Ju o Judalain**. Sampela taim ol i save kolim olsem ol **holi** Skripsa. Ol Skripsa em ol i save kolim olsem **holi** bikos ol i tokim yumi long God husat em i holi.

Sampela taim ol manmeri i save toktok long ol samting i kam long skripsa tasol ol i no save kolim dispela wod “ol Skripsa.” Olgeta manmeri i save olsem sapos yu tok “ol i bin raitim,” yu minim olsem ol i bin raitim insait long ol Skripsa.

Ol Skripsa em ol i no bin raitim i go daun long pepa, kain olsem nau yumi save mekim. Ol buk na pepa i no bin stap yet long dispela taim. Tasol, ol Skripsa em ol i bin raitim ol long ol longpela hap papirus o pasmen. Papirus em i wanpela hap pepa we i no strong we ol i mekim long wanpela plent, na pasmen em ol i mekim long skin bilong wanpela animal. Bikos ol dispela pepa i longpela tru, ol manmeri i save rolim ol. Nem bilong dispela kain rol pepa em skrol. Long tupela sait bilong skrol em ol manmeri i save putim wanpela longpela plang hendel, kain olsem wanpela raunpela stik. Taim ol manmeri i ritim samting i stap long wanpela skrol, ol bai rolim na openim wanpela sait bilong skrol, na rolim narapela hap bilong em raunim dispela stik,

Ol skrol em ol i ken bagarap hariap, planti taim ol dispela skrol we ol i mekim long papirus i save bagarap hariap. Olsem na ol lain we ol i kolim ol olsem ol skraib em olgeta taim i save bisi kopim ol raiting long wanpela skrol i go long nupela skrol, bai dispela raiting i no inap long lus. Ol skrol em ol i bin ekspensiv. Planti ol manmeri i no ownim wanpela skrol. Tasol, ol skrol em ol i save putim insait long **ol sinagog**-ples bilong ol Ju long bung. Planti ol Ju manmeri i save gut tru long ol bikpela pat bilong ol dispela skrol; sampela taim ol manmeri i no inap long rit tasol i ken kolim ol dispela bikpela pat bilong ol skrol.

sea-of-galilee

Raunwara Galili em i wanpela solwara, o wanpela raunwara, long hap not bilong **Israel**. Insait long Nupela Testamen, pat bilong kantri i stap klostu long Raunwara Galili we ol i kolim **Galili**.

Wanpela solwara, o wanpela raunwara, em i wanpela ples we i gat wara tasol. Wanpela solwara em i save bikpela moa long wanpela raunwara, tasol insait long Baibel, Raunwara Galili em sampela taim ol i save kolim olsem wanpela solwara, na sampela taim ol i save kolim olsem wanpela raunwara o laik.

Raunwara Galili em i klostu 20 kilomita longpela na 10 kilomita waid. Sapos yu laik long wokabaut raunim dispela raunwara, yu bai nid long wokabaut long wanpela o tupela de. Planti taim ol manmeri i save yusim **ol bot** long go long wanpela sait bilong raunwara na i go long narapela sait bilong raunwara. Namel bilong raunwara em i dip tru. I gat planti pis insait long dispela raunwara, na planti manmeri husat i save i stap long ol ples sait long raunwara i save ketsim pis na salim pis. Dispela wara insait long solwara em i fres, we i min olsem em i nogat sol, i no olsem wara insait long planti narapela solwara.

seed

Insait long wanpela plent, wanpela **sit** em i wanpela liklik pat bilong wanpela plent we wanpela nupela plent i ken gro. Ol manmeri i ken kolektim ol sit bilong wanpela plent na putim em i go insait long graun long groim moa plent.

Long sait bilong ol manmeri, sit bilong wanpela man em i narapela we bilong toktok long ol **lain tumbuna** bilong dispela man. Taim yu toktok long sit bilong wanpela man, yu ken minim wanpela tumbuna pikinini bilong dispela man o wanpela lain manmeri husat i tumbuna bilong dispela man.

servant

Wanpela **sevent o wokman o wokmeri** em i wanpela man o meri husat i save mekim wok bilong wanpela narapela man o meri. Ol sevent i ken wok insait long haus o long ol fild bilong masta bilong ol. Ol sevent i save i gat liklik posisen insait long komyuniti.

Sapos wanpela sevent em i no kisim pe long wok bilong em na i no gat fridom long lusim masta bilong em long wanem taim em i laik, orait dispela sevent em ol i save kolim olsem wanpela **sleiv o wokman nating**. Wanpela sleiv em i propeti bilong wanpela masta. Wanpela masta i ken salim sleiv i go long wanpela narapela man o meri, bikos em i ken salim ol propeti bilong em.

Ol sampela ol masta i save tritim ol sleiv nogut tru, tasol ol narapela masta i save mekim gutpela pasin na i ken tritim ol sleiv bilong ol olsem ol i pat bilong famili bilong ol.

Insait long Baibel, dispela wod sevent na sleiv em planti taim em i wankain. Sampela taim wanpela narapela wod bilong “sevent” em ol i save yusim long dispela olsem dispela man o meri i save mekim wok bilong ol narapela, tasol em i no wanpela sleiv.

shelter

Wanpela **selta** em i wanpela temporeri bilding we ol manmeri i ken mekim na stap insait long en long sotpela taim. Ol manmeri i mekim ol selta long ol brens na lip bilong diwai.

Ol Ju i save selebre'tim wanpela spesel festival wanpela taim long wanpela yia ol i save kolim “Fist bilong ol Selta,” o **Fist bilong ol Tabenakel** o ol haus sel.“ Long taim bilong dispela fist, ol Ju i save mekim ol selta o haus sel insait long ol gaden bilong ol o long ruf bilong ol haus bilong ol na ol i save stap insait long ol dispela selta long sevenpela de. Dispela i mekim ol manmeri i tingim olsem longpela taim i

go pinis, long taim bilong Moses, God i bin mekim fri ol tumbuna bilong ol long Ijip na ol i bin raun raun long **wildanes o ples nating** long planti yia i go inap ol i sindaun long kantri we God i bin promis long givim long ol. Ol dispela selta, o temporeri haus, i mekim ol Ju i tingim olsem ol tumbuna bilong ol i bin nogat pemenen ples bilong stap long ol dispela yia we ol i wok long raun raun.

sheol

Dispela wod **hel** em i nem bilong wanpela ples we ol **wiked** manmeri bai kisim panismen long hap bihain long ol i dai.

Wanem samting i save kamap long ol manmeri bihain long ol i dai? Yumi bai ting dispela em i streinj, tasol Baibel i no tok klia long dispela samting. Planti **ol Kristen** i save tok olsem ol manmeri husat i **bilip** long Jisas bai go long **heven**, na ol manmeri husat i no bilip bai go long hel. Tasol ol manmeri husat i stap long taim bilong Baibel i no olgeta taim i gat klia tingting long dispela.

Taim ol manmeri long Olpela Testamen i toktok long wanem samting i bin kamap long ol manmeri bihain long ol i dai, ol i tok olsem ol manmeri i go long “andawol” o “Seol.” Ol i tingim andawol olsem wanpela ples we i stap sampela hap aninit long graun o wol bilong yumi. Sampela hap insait long Olpela Testamen i toktok olsem olgeta gutpela na nogut manmeri wantaim i save go long andawol; ol narapela hap i tok olsem andawol em i ples bilong panismen bilong ol nogut manmeri tasol.

Insait long Nupela Testamen, ol manmeri i toktok tu long “andawol.” Sampela trenlesen i yusim **Grik** wod “**Heidis**” long minim dispela. Wankain olsem taim bilong Olpela Testamen, “andawol” sampela taim em i luk olsem wanpela ples we olgeta manmeri i save go bihain long ol i dai, na sampela taim em i luk olsem wanpela ples we ol manmeri nogut i kisim panismen long en. Sampela taim em i luk olsem wanpela ples we olgeta manmeri i save wet i stap long em i go inap long taim we God bai jasim olgeta manmeri. Sampela taim dispela wod “andawol” em i wanpela narapela we bilong toktok long dai.

Jisas i bin tokim ol manmeri olsem bihain long dai ol manmeri bai go insait long **kingdom bilong God**, o ol bai go long hel. Dispela wod hel long Grik tok ples em i kam long nem bilong wanpela ples klostu long **Jerusalem** we ol manmeri bilong **Israel** i bin brukim lo long hap. Bikos long dispela rong, ol manmeri i save abrusim dispela ples na yusim nem bilong em olsem wanpela ples bilong kukim ol bodi bilong ol animal we i dai pinis na bilong ol dai manmeri we i hat long

planim bodi bilong ol. Ol manmeri i save mekim paia i lait olgeta taim long dispela ples. Olgeta taim ol manmeri i tingim dispela ples, ol i pilim nogut tru, na ol i tingting long God i panisim ol manmeri long ol bikpela rong tru. Long dispela as, ol manmeri i stat long yusim nem bilong dispela ples olsem nem bilong ples we olgeta wiked manmeri bai go na kisim panismen bihain long ol i dai. Jisas i mekim klia olsem hel em i wanpela ples nogut tru: Em i yusim tok piksa long diskraibim em olsem wanpela ples we paia i no save pinis, olsem wanpela ples we ol manmeri bai kisim bikpela pen long bodi, o wanpela ples we ol manmeri bai krai na oltaim ol bai rigretim ol disisen ol i bin mekim.

Jisas i bin tisim ol manmeri olsem hel em i wanpela ples tu we **Satan** na **ol dimon** bai kisim panismen.

shepherd

Wanpela **seped** em i wanpela man husat i save lukautim sipsip na gout o meme. Ol sipsip na gout em o animal we ol manmeri i save lukautim long yusim milk bilong ol, kaikai mit bilong ol, na long yusim gras bilong ol long mekim klos. Wanpela sipsip em i wanpela jentel animal we i save stap isi. Ol gout em ol i wankain long ol sipsip, tasol ol i gat moa tempa, na i hat moa long lidim.

Wanpela grup bilong sipsip o gout em ol i save kolim olsem wanpela flock. Wanpela seped em i gat wok long kisim ol flock bilong em i go long ol ples we ol i ken painim gras o plent we ol i nid long kaikai na ples we ol i ken dringim wara. Wanpela seped em i nid long sekim na lukim olsem wanpela bilong ol sipsip na gout i no lus. Wok bilong stap olsem wanpela seped em i hatpela wok, bikos sampela taim ol i nid long wokabaut longpela hap wantaim ol animal bilong ol long painim inap kaikai na wara bilong ol long dring, na planti taim ol i nid long stap longwe long haus na slip autsait wantaim ol animal. Wanpela seped tu i nid long protektim flock bilong em long ol wel animal. King **Devit**, em i dispela **king** we planti manmeri bilong **Israel** i save laikim tru, em i bin wanpela seped bipo long em i kamap king.

Bikos ol seped em ol i planti tru insait long Israel, dispela wod seped em planti taim ol i save yusim olsem tok piksa bilong wanpela protekta o rula. God i kolim em yet olsem Seped bilong Israel. Ol manmeri em ol i save kolim ol olsem ol sipsip bilong God. Jisas i kolim em yet olsem Gutpela Seped, bikos em i givim laip bilong em bai “ol sipsip bilong em”-ol manmeri-ken stap seif long denja o samting we i ken kilim ol.

Insait long taim bilong Nupela Testamen, sampela manmeri i save luk daun long ol seped, na ol i save ting olsem ol i raf na i no gat edukesen.

sign

Wanpela **sain** em i wanpela samting we i narakain samting we i kamap bikos long wanpela spesel risen. God i ken givim wanpela sain long tokim ol manmeri olsem wanem samting em i tok em i tru. Eksampel, taim God i promisim Noa olsem em bai no inap long bagarapim graun wantaim wara gen, em i putim renbo long skai olsem wanpela sain. Olgeta taim ol manmeri i lukim renbo, ol i ken tingim promis bilong God.

Sampela taim God i save givim wanpela sain olsem wanpela woning o tok lukaut olsem wanpela bikpela samting bai kamap. Eksampel, God i tokim **pris** Eli olsem tupela pikinini man bilong Eli bai dai long seim de. Dispela em bai wanpela sain olsem olgeta samting we God i bin tok em bai kamap long **ol Israel** olsem panismen long **ol sin** bilong ol, em bai kamap tru tru.

Jisas i bin mekim planti **mirakel**. Ol dispela mirakel em ol sain we i soim ol manmeri olsem Jisas em tru tru God i bin salim em, na ol manmeri i mas putim yau long wanem samting Jisas i wok long tok long God.

Ol biliva o bilipmanmeri bilong Jisas ol tu i bin mekim ol mirakel. Ol dispela em ol sain we i soim olsem ol biliva bilong Jisas i wok long mekim trupela. Ol trupela toktok we i tokim ol manmeri long Jisas.

Bikos wanpela sain em i wankain liklik long wanpela mirakel, yumi planti taim i harim dispela hap tok insait long Baibel “ol sain na ol mirakel” o “ol sain na wanda.”

Ol sain i save helpim ol manmeri long **bilip**, tasol yumi nid long trastim God maski sapos em i no givim wanpela sain. Sapos ol manmeri i trastim God taim ol i lukim ol sain tasol, orait ol i no trastim em tru tru. Olsem na Jisas i no laik long mekim wanpela sain long ol manmeri taim ol i askim em long mekim.

Maski taim God i mekim wanpela sain, ol manmeri husat i laik long bilipim em, em ol tasol bai bilipim dispela sain. Ol narapela manmeri bai tok olsem sain em i no tru o i no bin kam long God.

sin

God i wokim olgeta hap bilong graun na em i gutpela. God i bin wokim ol manmeri long makim em long graun. God i tokim ol manmeri long lukautim graun. Pastaim, man na meri i bin gat wanpela gutpela **rilesensip** wantaim God, wantaim wanpela narapela, na wantaim ol samting we God i wokim. Tasol ol

manmeri i stat long sakim tok bilong God. Ol i stop long trastim God, na ol i laik long mekim ol disisen bilong ol yet long wanem samting i gutpela long ol. Ol i no laik moa long larim [atoriti](#) bilong God i stap antap long laip bilong ol. Dispela pasin bilong sakim tok bilong God em ol i kolim **sin**. Bikos long dispela pasin bilong sakim tok, gutpela rilesensip we ol manmeri i bin gat wampela God i bin bruk. Na i no dispela tasol, gutpela rilesensip we ol manmeri i bin gat wantaim wampela narapela em i bin bruk tu, na olgeta samting we God i bin safa tu.

Dispela pasin bilong sakim tok bilong God i save kamap long kainkain we. God i bin mekim ol gutpela **lo**, na sapos ol manmeri i bihainim ol dispeola lo, orait ol manmeri bai inap long stap wantaim na i gat [pis o bel isi](#). Tasol ol manmeri i wok long brukim lo olgeta taim. Taim wampela man o meri i brukim wampela lo bilong God, em i mekim sin.

God i save les tru o heitim sin. Bel bilong em i save krai taim ol manmeri i sakim tok bilong em, bikos ol lo bilong em i bilong gutpela bilong ol manmeri. Olsem na God i nid long panisim ol manmeri bikos ol i mekim sin. Sapos ol i kontinu long mekim sin, orait panismen em dai.

Jisas i bin tisim yumi olsem sin em i no pasin bilong **mekim** rong samting tasol. **Tingting** long ol rong samting em i sin tu, maski sapos no gat wampela narapela man o meri i save long dispela tngtingl. Praid o paitim bros, jeles, na mangal pasin em ol i sin. Pasin bilong luk daun long ol narapela manmeri em i sin. Yumi ken mekim planti gutpela samting long ai bilong ol manmeri, tasol sapos yumi i praud tumas long wanem samting yumi mekim, yumi wok long mekim sin.

Baibel i tisim yumi olsem Jisas i seivim ol manmeri long ol sin bilong ol. Dispela i min olsem God bai no inap long givim ol panismen we ol i sapos long kisim. Dispela em bikos Jisas i kisim panismen long ples bilong ol. Insait long Olpela Testamen, rot bilong ol manmeri long askim [fogivnes](#) long ol sin bilong ol em long ofaim wampela [sekrifais](#) long God. Ol manmeri i nid long kilim wampela animal na ofaim dispela i go long God long kisim ples bilong laip bilong ol. Dispela animal we ol i ofarim long God em i nid long wampela gutpela animal, we i no gat wampela samting i rong long em. Bikos long dispela sekrifais, God i bin fogivim ol-tasol em i fogivim ol i go inap narapela taim gen we ol i mekim sin, em ol i mas askim long fogivnes gen. Jisas em yet i kamap nambawan gutpela sekrifais bilong olgeta manmeri. Jisas em yet i no bin mekim wampela sin, olsem na em i olsem wampela nambawan gutpela animal sekrifais. Sekrifais bilong Jisas em i

pawaful tru, olsem na bikos long dispela God i wanbel long fogivim sin bilong olgeta manmeri-i no long sotpela taim tasol, tasol long oltaim oltaim. God bai fogivim olgeta manmeri husat i bilip olsem Jisas i dai long ples bilong ol. Ol dispela manmeri em “Jisas i seivim ol.” Ol i no nid long pret moa long panismen bilong sin. God i tok olsem ol dispela manmeri nau em ol i **kamap stretpela manmeri**.

Dispela fogivnes em i no liklik samting! Jisas i givim laip bilong em long mekim dispela. Olsem na, husat man o meri i bilip long sekrifais bilong Jisas, em bai traim best long stop long mekim sin, bikos em i amamas tru long Jisas. Pol i tisim yumi olsem bipo long Jisas i kisim bek yumi, yumi i bin stap olsem **ol wokmanmeri** bilong sin. Dispela i min olsem yumi bin pundaun long presa na traim bilong mekim ol sin. Tasol nau God i fogivim yumi, yumi kamap ol wokmanmeri bilong stretpela pasin-yumi olgeta taim i laik long mekim ol samting we i amamasim God, na i no mekim ol samting we i mekim em i wari.

Em i hat tru yet-na tu, i hat olgeta-long ol manmeri long i no mekim sin. Tasol God i bin givim [Holi Spirit](#) bilong em long helpim yumi. Holi Spirit i helpim yumi long lukim ol samting we i sin, na helpim yumi long daunim traim bilong mekim sin. Sapos Holi Spirit i no helpim yumi, yumi no inap long mekim dispela.

Taim Jisas i kisim bek yumi, yumi ken mekim sin yet, tasol yumi i no ol sinmanmeri moa. Bikos nau, yumi **tok sori** taim yumi sin. Wampela sinman o sinmeri em i wampela man o meri husat i kontinu long mekim sin, maski em i save olsem dispela em i rong.

Taim Jisas i kam long graun, ol lida bilong lotu i wok long komplem olsem Jisas i kaikai wantaim ol sinmanmeri. Ol lida bilong lotu i yusim wod “ol sinmanmeri” long toktok long wampela grup o lain manmeri husat i no save bihainim ol lo bilong God, eksampel, ol pamuk manmeri na ol lain i save kolektim ol takis. Ol lida bilong lotu, planti taim ol **Farisi**, i luk daun long ol dispela manmeri. Tasol planti bilong ol dispela-sinmanmeri husat i kam long harim Jisas i laik long tok sori long ol sin bilong ol. Jisas i eksplenim long ol lida bilong lotu olsem dispela em i risen wai em i kam long graun: long mekim ol manmeri i **tok sori na lusim** ol sin bilong ol. Jisas i soim ol manmeri olsem God i amamas moa long ol sinmanmeri husat i tok sori na lusim sin, na em i no amamas long ol manmeri husat i praud tru na ol i no ting olsem ol i nid long tok sori na lusim sin.

Taim yu wok long trensletim “sin”, yu mas lukaut long ol dispela samting:

Ol sampela kalsa i ting olsem ol sampela eksen em i nogut sapos ol lain i painimaut long ol. Eksampel, ol i ken ting olsem pasin bilong hait na mekim rong em i orait, bikipela samting em no gat lain i painimaut o i save long en, em i kamap wanpela problem taim ol narapela manmeri i painimaut long em na taim em i kamapim sem. Dispela wod bilong sin insait long Baibel em i no olsem. Pasin bilong sakim tok bilong God em i nogut, maski ol narapela manmeri i save long dispela, o nogat.

Sampela ol kalsa i gat wanpela wod bilong sin we i min olsem mekim wanpela wok kastom long rong we, o mekim samting we i agensim tumbuna pasin, o mekim samting we yu no gat pawa long mekim. Dispela em i no wanem samting sin insait long Baibel i toktok long en. Jisas i tisim yumi olsem sin em i no toktok long pasin bilong mekim ol kastom wok, tasol em i toktok long ol tingting na pasin bilong yumi. Maski ol manmeri husat i mekim olgeta ol kastom wok na bihainim gut tru ol pasin we komyuniti i laikim ol long mekim, ol i wok long sakim tok bilong God yet na i wok long mekim sin.

Ol sampela kalsa i yusim wanpela wod bilong sin we i minim ‘pasin bilong i no bisi.’ Dispela em i no wanem samting wod sin insait long Baibel i minim.

Ol sampela kalsa i gat wanpela wod bilong sin we ol i save yusim long ol pasin bilong brukim lo tasol, kain olsem pasin bilong kilim man o stil. Dispela wod sin insait long Baibel em i minim moa long ol kraim o pasin bilong brukim lo. Ol manmeri husat i no bin brukim lo bilong kantri, em ol i ken brukim lo bilong God na mekim sin.

slave

Wanpela sevent em i wanpela man o meri husat i save mekim wok bilong wanpela narapela man o meri. Ol sevent i ken wok insait long haus o long ol fild bilong masta bilong ol. Ol sevent i save i gat liklik posisten insait long komyuniti.

Sapos wanpela sevent em i no kisim pe long wok bilong em na i no gat freedom long lusim masta bilong em long wanem taim em i laik, orait dispela sevent em ol i save kolim olsem wanpela **sleiv o wokboi nating**. Wanpela sleiv em i propeti bilong wanpela masta. Wanpela masta i ken salim sleiv i go long wanpela narapela man o meri, bikos em i ken salim ol propeti bilong em.

Ol sampela ol masta i save tritim ol sleiv nogut tru, tasol ol narapela masta i save mekim gutpela pasin na i ken tritim ol sleiv bilong ol olsem ol i pat bilong famili bilong ol.

Insait long Baibel, dispela wod sevent na sleiv em planti taim em i wankain. Sampela taim wanpela narapela wod bilong “sevent” em ol i save yusim long minim man o meri i save mekim wok bilong ol narapela, tasol em i no wanpela sleiv.

sojourner

Wanpela man o meri em i wanpela **forenao** kam man insait long wanpela kantri we em i no bon insait long en. Ol Strenja o **sojena** em ol manmeri husat i forena insait long wanpela kantri na ol i stap long hap sotpela taim tasol, maski em i no ples we ol i bon long em. **Abraham** em i bin wanpela forena o strenja, insait long Kenan. Bihain, taim ol lain tumbuna bilong Abraham, **ol Israel** i bin mekim Kenan i kamap kantri bilong ol yet, God i givim ol gaidlain long hau ol i mas tritim ol forena o kam kam, na ol strenja o sojena, husat i travel insait long kantri bilong ol na husat i stap namel long ol lain Israel.

son

Wanpela **san** em i wanpela pikinini man bilong ol papamama bilong em. Tasol ol manmeri i ken kolim wanpela pikinini “san” maski sapos ol i no wanpela famili. Sapos yu kolim wanpela pikinini “san,” dispela em i min olsem yu lukim em olsem em i lain bilong yu. Planti taim, wanpela bik man o meri i save kolim wanpela yangpela man “san.”

son-of-david

Pikinini bilong Devit em i minim wanpela **tumbuna** bilong **Devit**, maski sapos dispela tumbuna em i bon planti jeneresen bihain long Devit.

Devit em i wanpela king we **ol Israel** i save laikim tru, na em i bin stap planti taunsen yia bipo long Jisas i bon. God i bin promisim Devit olsem olgeta taim wanpela bilong ol lain tumbuna bilong em bai rulim **Israel**. Tasol bikos ol Israel i save no save harim tok bilong God, God i larim ol enemi bilong ol long daunim ol. **Kingdom** Israel i bin pinis. Tasol maski insait long dispela hatpela taim, God i bin givim mesej bilong hop long ol manmeri. Long ol mausman bilong em, **ol profet**, God i bin tokim ol manmeri olsem wanpela taim bai kam we wanpela tumbuna bilong Devit bai rulim Israel. Dispela **king** em bai seivim ol manmeri long ol trabel bilong ol na mekim olgeta samting i kamap rait gen.

Olsem na ol Israel i bin lukluk long wanpela de God bai salim wanpela king na **Sevia** i kam long ol manmeri. Ol i kolim dispela king we God i promis long salim olsem **Mesaiya**, o **Krais**. Wanpela Mesaiya em i wanpela man we ol i makim long mekim wanpela spesel wok.

Mesaiya em bai wanpela tumbuna bilong Devit. Taim ol manmeri insait long Nupela Testamen i kolim Jisas “pikinini bilong Devit,” ol i minim long tok olsem ol i **bilip** olsem Jisas em i dispela spesel king na Sevia we God i bin promis long salim.

son-of-god

Pikinini bilong God em i wanpela taitel bilong Jisas. Jisas em ol i kolim olsem **pikinini** bilong God bikos em i gat wanpela spesel rilesensip wantaim Papa God. God na Jisas i laikim wanpela narapela olsem wanpela papa na pikinini i save laikim wanpela narapela. Sampela ol i save kolim Jisas olsem “wanpela pikinini tasol bilong God.” Dispela em i min olsem rilesensip we Jisas i gat wantaim God em i narakain. No gat wanpela narapela lain i gat dispela seim rilesensip wantaim God olsem Jisas i gat.

Jisas em i pikinini bilong God em i min olsem em yet tu i God. Jisas em i wanpela bilong Trinita-wanpela wod we sios i save yusim long diskraibim olsem God em i **wanpela**, tasol long seim taim i gatt**ripela** man: God Papa, God Pikinini, na God **Holi Spirit**. Jisas olgeta taim i bin stap olsem Pikinini bilong God, bipo long stat bilong taim, na bipo long God i wokim graun na olgeta samting insait long em. Taim Jisas i kam long graun, na em i bin bon, em i kamap olsem wanpela man tu.

Taim ol manmeri insait long Nupela Testamen i kolim Jisas Pikinini bilong God, dispela em i wanpela narapela we bilong tok olsem Jisas em i **Mesaiya**, dispela **Krais**-dispela king we God i bin promis na **Sevia**.

Taim ol manmeri i stat long trastim Jisas, God i kisim ol olsem ol pikinini bilong em. Olsem na Baibel sampela taim i save yusim dispela hap tok “**ol pikinini** bilong God” long toktok ol manmeri husat i trastim Jisas na bihainim em.

son-of-man

Pikinini bilong Man em i wanpela taitel we Jisas i givim long em yet. Taim Jisas i tok wanpela samting long “Pikinini bilong Man,” em i wok long mekim dispela tok long em yet. Long **Hibru**, tok ples bilong Olpela Testamen, dispela hap tok em i min olsem “wanpela man,” tasol Jisas i givim dispela wod wanpela spesel mining.

Dispela hap tok “Pikinini bilong Man” em i save kamap long wanpela spesel we insait long Olpela Testamen, insait long buk bilong Daniel. Daniel em i wanpela bilong **ol Israel** husat i bin stap 600 yia bipo long Jisas. Long wanpela taim, em i bin gat wanpela **visen** we em i lukim wanpela man husat i luk olsem wanpela

“Pikinini bilong Man.” Insait long visen bilong Daniel, God i givim olgeta **atoriti** long dispela man, na dispela man i kamap wanpela king, na olgeta manmeri long graun i kam aninit long em. **Kingdom** bilong em i no inap pinis.

Taim Jisas i kolim em yet “Pikinini bilong Man,” em i wok long tokim ol manmeri “Mi dispela man insait long visen bilong Daniel. Mi dispela king, na God i givim mi olgeta atoriti.” Em i wanpela narapela we bilong tok olsem Jisas em i **Mesaiya**-dispela spesel king na **Sevia** we God i bin promis long salim-na dispela tok em i no tokaut stret. Long taim bilong Jisas, ol manmeri i no save yusim dispela wod “Pikinini bilong Man” olsem narapela taitel bilong Mesaiya. Olsem na taim Jisas i kolim em yet “Pikinini bilong Man,” ol manmeri i no wantu tasol tingting long Mesaiya. Tasol, ol manmeri i bin luksave olsem Jisas em i wok long tok olsem em i gat olgeta atoriti i kam long God. Ol manmeri i nid long painimaut isi isi wanem samting Jisas i minim taim em i kolim em yet olsem “Pikinini bilong Man.”

Ol orijinel lain i harim Jisas i toktok em ol i andasten olsem Jisas i wok long toktok long em yet taim em i toktok long Pikinini bilong Man. Sapos ol lain i harim yu i no inap long andasten olsem Jisas i wok long toktok long em yet, orait yu bai nid long mekim dispela i kamap klia. Sapos yu laik long mekim moa klia wanem samting em “Pikinini bilong Man,” yu ken tok olsem “Mi kam long God wantaim atoriti bilong God.”

O, sapos yu laik long mekim mining i no klia, olsem hau em i stap insait long Baibel, yu bai nid long mekim em i klia gen olsem “Pikinini bilong Man” em i wanpela taitel. Yu ken tok samting olsem “Mi, em mi dispela man husat ol i bin kolim ‘Pikinini bilong Man,’ o ‘Pikinini bilong Ol Man.’”

soul

God i wokim ol manmeri wantaim wanpela bodi, na yumi ken tasim na lukim bodi bilong wanpela narapela. Tasol God i wokim ol manmeri tu wantaim ol filings, tingting na strongpela laik bilong mekim samting. Yumi no inap long lukim dispela pat bilong wanpela man o meri, tasol yumi save olsem em i stap. Dispela pat bilong wanpela man o meri we yumi i no inap long lukim em ol i save kolim olsem **soul** insait long Baibel. Maski bodi bilong yumi em i dai, soul bilong yumi em bai stap yet.

Sapos yumi no gat soul, yumi i no komplut man o meri. Olsem na, Baibel i planti taim i yusim wod soul olsem wanpela narapela we bilong kolim “wanpela man o meri.” Eksampel, insait long wanpela hap bilong Baibel, em i toktok long “fotinpela soul insait long

wanpela famili.” Dispela em i min olsem i gat fotinpela manmeri insait long wanpela famili.

Insait long ol narapela hap, dispela wod soul em i toktok long **laip** bilong wanpela man o meri. Jisas i bin tok olsem em i kam long givim **soul** bilong em long ol manmeri. Dispela em i min olsem em i kam long givim **laip** bilong em long ol manmeri.

Baibel i yusim dispela wod “**spirit**” tu long toktok long insait pat bilong man o meri we yumi no inap long lukim. Taim Baibel i yusim dispela wod spirit, em i fokas long **rilesensip** we wanpela man o meri i gat wantaim God. Taim yumi **pre**, ol spirit bilong yumi i save toktok wantaim God. Taim wanpela man o meri husat i **bilip** long Jisas na em i dai, spirit bilong em bai kontinu long stap wantaim God.

Sampela manmeri i ting olsem spirit na soul i wankain, na olsem dispela tupela wod i fokas moa long wanpela samting tasol. Ol narapela manmeri i ting olsem dispela tupela wod i narapela narapela, na wanwan manmeri i gat wanpela bodi, soul na spirit.

Taim yu wok long trensletim “soul”, yu mas lukaut long ol dispela samting:

Plis tingim olsem yu nid tu long i gat wanpela wod bilong “spirit,” na “maind.” Dispela ol wod hat, maind, soul na spirit olgeta i toktok long insait pat bilong man yumi no inap long lukim, tasol wanwan bilong ol i gat narapela yus bilong em. Yu ken putim yau na harim ol eksplenesen bilong wanwan bilong ol dispela wod, na bihain diskasim olgeta dispela fopela wod wantaim. Yu ken mekim wanpela disisen long hau yu bai trensletim wanwan bilong ol dispela wod. Tasol tingim olsem long wanwan taim yu bai nid long mekim disisen gen sapos yu bin susim raitpela wod. Sampela taim wanpela bilong ol dispela wod i ken fit gut moa long narapela wod.

Hia em i wanpela sotpela tok save bilong ol dispela fopela wod:

spirit

God i wokim ol manmeri wantaim wanpela bodi, na yumi ken tasim na lukim bodi bilong wanpela narapela. Tasol God i wokim ol manmeri tu wantaim ol filings, tingting na strongpela laik bilong mekim samting. Yumi no inap long lukim dispela olsem pat bilong wanpela man o meri, tasol yumi save olsem em i stap. Dispela pat bilong wanpela man o meri we yumi no inap lukim, insait long Baibel ol i kolim **soul**, tasol sampela taim ol i kolim **spirit**.

Taim Baibel i yusim dispela wod spirit, em i fokas long **rilesensip** we wanpela man o meri i gat wantaim

God. Taim yumi **pre**, ol spirit bilong yumi i save toktok wantaim God. Taim wanpela man o meri husat i **bilip** long Jisas na em i dai, spirit bilong em bai kontinu long stap wantaim God.

Sampela manmeri i ting olsem spirit na soul i ken wankain, na dispela tupela wod i fokas moa long wanpela liklik samting tasol. Ol narapela manmeri i ting olsem dispela tupela wod i narapela narapela, na wanwan manmeri tu i gat wanpela bodi, soul na spirit.

Taim yu wok long trensletim “spirit,” yu mas lukaut long ol dispela samting:

Plis tingim olsem yu nid tu long gat wanpela wod bilong “soul,” “hat,” na “maind.” Dispela ol wod spirit, soul, hat na maind, olgeta i toktok long insait pat bilong man yumi no i inap long lukim, tasol wanwan bilong ol i gat narapela yus bilong em. Yu ken putim yau na harim ol eksplenesen bilong wanwan bilong ol dispela wod, na bihain diskasim olgeta dispela fopela wod wantaim. Yu ken mekim wanpela disisen long hau yu bai trensletim wanwan bilong ol dispela wod. Tasol tingim olsem long wanwan taim yu bai nid long mekim disisen gen sapos yu bin susim raitpela wod. Sampela taim wanpela bilong ol dispela wod i ken fit gut moa long narapela wod.

Hia em i wanpela sotpela tok save bilong ol dispela fopela wod:

strength

Strengt o strong em i toktok long strong bilong mekim samting, o strong bilong bodi. Ol dispela wod “**hat**, **soul**, **maind**, na **strengt o strong**” olgeta i wok wantaim long diskraibim pasin na samting we wanpela man o meri i ken mekim.

synagogue

Wanpela **sinagog** em i wanpela ples we **ol Ju o Juda** manmeri i save bung long **pre** na long stadim **ol Skripsa**, na tu long holim ol toktok na harim ol titsing.

Wanpela sinagog em i no wankain olsem **tempel**. Tempel em i bin ples we ol manmeri i save bringim **ol sekrifais** i go long God. Ol manmeri i no save bringim ol sekrifais insait long wanpela sinagog. I gat wanpela tempel tasol bilong ol Ju, insait long **Jerusalem**, tasol i gat planti sinagog. Yumi no harim planti toktok long ol sinagog insait long Olpela Testamen, tasol long taim bilong Nupela Testamen, i gat planti sinagog long **Israel**, na tu i gat sinagog long planti narapela kantri we ol Ju o Judamanmeri i bin stap insait long en.

Ol Ju i bin save bung insait long ol sinagog long **Sabat** -dispela de bilong malolo long olgeta wik-na long ol spesel fist de. Long taim bilong ol i bung, ol i save pre wantaim, ritim ol Skripsa, ol buk long Baibel we yumi nau save kolim Olpela Testamen, na putim hau long titsing bilong ol Skripsa.

Wanwan sinagog i bin gat wanpela rula husat i risponsibel long dispela bilding na long sekim olsem olgeta samting em ol lain i mekim gut. Rula bilong sinagog em i save go pas long wok bilong singautim ol manmeri i kam long pre, long ritim ol Skripsa, long tis.

Ol Skripsa em ol i bin raitim long ol skrol-ol longpela hap meteriel we ol i mekim long rop bilong sampela plent o skin bilong ol animal-na ol i rolim. Ol dispela skrol em ol i save putim long ol bokis insait long sinagog. Ol skrol em ol i impoten tru. Wanpela spesel man o meri em i gat wok bilong kisim ol skrol i kam autsait long bokis na givim i go long man husat bai ritim.

Sinagog em ol i save yusim tu olsem wanpela skul bilong ol pikinini, na olsem wanpela miting ples bilong ol manmeri long toktok long ol hevi o samting i kamap insait long komyuniti bilong ol.

Taim yu wok long trensletim “sinagog”, yu mas lukaut long ol dispela samting:

Yu mas no ken yusim seim wod we yu wok long yusim long **tempel**. Na tu, yu mas no ken yusim seim wod olsem yu wok long yusim long wanpela **sios** bilding o haus lotu. Yu ken yusim wanpela hap tok olsem “Miting haus bilong ol Ju o Judalain,” o “prea haus.”

synagogue-ruler

Wanpela **sinagog** em i wanpela ples we **ol Ju o** Juda manmeri i save bung long **pre** na long stadim ol **Skripsa**, na tu long holim ol toktok na harim ol titsing. Wanwan sinagog i bin gat wanpela **man i bosim em** husat i risponsibel long dispela bilding na long sekim olsem olgeta samting em ol lain i mekim gut. Man i bosim dispela bilong sinagog em i go pas long wok bilong singautim ol manmeri i kam long pre, long ritim ol Skripsa i go long ol, o long skulim ol.

syrian-phoenicia

Fonisia em i nem bilong wanpela eria long hap not bilong **Israel**. Fonisia em i bin wanpela longpela hap eria we i gat faivpela siti long nambis bilong Medeterenien Solwara.

Long taim bilong Nupela Testamen, dispela eria em i pat bilong kantri ol i kolim Siria. Long dispela as, wanpela man o meri husat i kam long dispela eria em

ol i save kolim em olsem wanpela “Sirien Finisien.” Planti ol narapela manmeri husat i stap long dispela eria em ol i bin kam long ol narapela kantri, na planti bilong ol em ol i kam kantri Gris. Planti bilong ol manmeri insait long dispela eria em ol i save treid - we ol i save baim na salim ol samting, na planti bilong ol dispela samting i save kam long ol sip.

Tude, dispela eria em i pat bilong kantri we nau yumi save long en olsem Lebanon.